



## **Intervención da presidenta do Parlamento de Galicia na celebración do Día da Galeguidade Empresarial**

Salón dos Reis, Parlamento de Galicia

22 de outubro de 2014 // 11.00 h

Vicepresidente do Parlamento,  
Conselleiro de Cultura, Educación e Ordenación  
Universitaria,  
Presidente do Foro Enrique Peinador,  
Secretario xeral de Política Lingüística,  
Portavoz,  
Fiscal Superior de Galicia,  
Conselleiro maior do Consello de Contas (en funcións),  
Deputados e deputadas,  
Exdeputados,  
Autoridades,  
Señoras e Señores:



Bo día:

Benvidos todos ao Parlamento de Galicia, casa común de todos nós, casa das palabras.

Filgueira Valverde, autor proposto pola Real Academia Galega para ser homenaxeado no vindeiro Día das Letras Galegas, propoñía o 24 de outubro de 1969, unha emenda á *Ley General de Educación*, no seu artigo 17, apartado 1, para o <<reconocimiento explícito de que las lenguas vernáculas no son algo extraño a lo español sino parte integrante de un patrimonio cultural común>>.

Eran tempos difíciles pero xa daquela o escritor e polígrafo loitaba pola nosa lingua.

<<Si aínda somos galegos é por obra e gracia do idioma>> escribía Castelao en *Sempre en Galiza*.

En 1977, a Universidade de Santiago e mais o Instituto de Estudos e Desenvolvemento de Galicia xuntan a un feixe de galegos sobranceiros para soñar xuntos cal sería a Galicia ideal de 2002.

Un destes persoeiros, García-Sabell, poñía no primeiro lugar da súa utopía o <<emprego universal e constante da lingua galega. Dende a nenez astra a morte, [...] de tal xeito que o falar e o escribir no noso idioma resulte algo QUE NON SE NOTE [...] feito corpo do falante>>.



Ramón Piñeiro –que tamén formaba parte dos que en 1977 alí soñaban--, anos despois, na súa defensa, xa como deputado do Parlamento de Galicia, do texto da Lei de Normalización Lingüística, expoñía, na antiga sede de Fonseca, en 1983, que <<a lingua é a expresión da nosa identidade. Toda lingua é a expresión viva dunha cultura orixinal e, mesmo por iso, a lingua galega é a raíz e a forza impulsora da nosa orixinalidade cultural. Entre os lazos comunais con que contamos, a lingua é o máis fondo, é o que ós galegos nos une con máis forza. Certo que, tendo unha historia común, un pasado histórico común, pertencendo a un mesmo país, vivindo uns mesmos problemas, pois temos una conciencia solidaria, temos unha responsabilidade común, quere decir que temos una estrutura de pobo, pero o que a esa estrutura de pobo lle dá un contido cálido de fraternidade é a lingua. É a lingua a que fai que esa conciencia solidaria vibre co sentimento de irmandade>>.

Todos nós somos conscientes da importancia que para este país tivo a Lei de normalización lingüística, a recuperación que supuxo respecto da fala, o feito de que fixese normal o uso da lingua, que a pesar de moitos atrancos se conservara ao longo dos séculos.

Mais <<as leis non resolven o substrato cultural dun país, son unha peza importante, pero o compromiso diario, a praxe diaria é a que vai renovando ese substrato cultural, que é unha gran oposición á normalización real do noso galego>>, dicía o falecido Anxo Guerreiro no mesmo debate.



Nese *continuum* de defensa da lingua en todos os eidos, nesa empresa de facela corpo co falante, nesa cruzada de galeguizar todos os eidos cotiáns, de introducila en todos os substratos culturais, compartimos hoxe esta xornada coa Xunta de Galicia e mais o Foro Enrique Peinador, que achegan ata esta casa das palabras a outro feixe de galegos emprendedores:

- Que recoñecen publicamente que os seus produtos se venden mellor en galego.
- Que veñen celebrar ao Parlamento o Primeiro Día da Galeguidade Empresarial.
- Que etiquetan a súa produción na lingua de todos nós.

¿Que mellor identificación cos productos de noso que a nominación na nosa lingua?.

Felicito a Xunta de Galicia, a través da Secretaría Xeral de Política Lingüística, e mais o Foro Enrique Peinador por esta iniciativa. E agradezo o esforzo das empresarias e empresarios galegos que se achegaron ata o Parlamento de Galicia, casa de todos, e de novo me congratulo por esta idea.

A todos, reitero, moitas grazas.